


SCHNAPPLÜFTLI



E Infobleddli fir unseri Gönner

Uusgoob 1/00



- Neyi Redaggtion
- Faasnachts-Info
- Neyi Rubricge

Erschijnigswyys: 2 x pro Joor
Ufflaag: 150 Exemplaar
Gstaltig: Roger Müller und
Werni Hauser
Drugg: Xerox Docu Color
Adrässe: Roger Müller
Birsquai 9
4127 Birsfelden

oder roger.mueller@oekk.ch

Spöter als normal, mit neyem Outfit und e bitzeli neyem Konzäpt: das isch s erschte Schnapplüftli im Joor 2000. S wird nämmlig vomme neye Team gmacht – warum?

Liebi Gönner und Gönnerinne

Dr Marco, unsere Obmaa und Redaggger syt dr erschte Luftschnapperli-Stund, het das Ämtli abgää. Verständlig. Als Preesi vom FC Alemannia Basel het är nämmlig syt em Summer 99 no e wyteri aaspruchsvolli Uffgoob als Vereinsmaier ibernoo. Näbscht em Zytuffwand, isch au dr Gedangge vonere Veränderig fir s Schnapplüftli im Vordergrund gstande. Um dr Marco z entlaschte, han ich den au spontaan zuegsait, wo är mi aagfroogt het, das Ämtli als Chefredaggger z ibernää.

Dr Werni unsere Major, au syt Joore als zwaite Redaggger tätig, bliibt yys aber erhalte. Är hilft bym teggschte und gsalte. Und dr Kutli het yys fyrs neue Konzäpt e paar wärtvolli Inputs gää. Zämme hämmer yys iberleggt, wie me däm Bleddli e bitzeli e neye Wind (Lüftli) kennt verpasse. S Resultaat liggt jetzt doo. Mit alt Bewährtem, neye Rubrigge, mee Bildli und ere neye Erschinigsform

In Zukunft kunnt s Schnapplüftli nämmlig immer kurz vor dr Faasnacht um eych primäär uff die drey scheenschte Dääg vorzberaite und gluschtig z mache. In däre Uusgoob sin au d Informatioone was, wenn, wo usw. mir rund um d Faasnacht mache. Die zwaiti Nummere im Joor kunnt denn jewyyls nach unserer

Generalversammlig uuse. Die näggschtig GV isch übrigens am 6. Mai das Joor. E Ruggblig uf d Faasnacht und diversi anderi Byträag sinn denn dört inne s Thema.



Drey Zytigsänte 1992

Mir hoffe, dr händ Spass am neye Schnapplüftli. Fyr Aareegige, Byträg und (wenns si muess!) Kritik hämmer immer offeni Oore.

Jetzt wynsche mir euch allne e scheeni Faasnacht. Lueget bitte in däre Uusgoob wenn und wo mir laufe und aazdräffe sinn. Es würd uns freye, mit em aint oder andere e Gleeesli Wyysse znää.

Roger

**E paar vo euch hänn
woorschynlig scho kheert
oder gläse (im Rädebäng):
unser ney Sujet isch widder
emol typisch baslerisch. D
Grundidee stammt von Fix und
em Roger.**

**E huffe Idee sinn an dr
Sujetsitzig vordrait worde.
Schlussändlig het me sich aber
fir das entscheide, well es halt
vom Roger scho relativ guet
uusgschaft gsii isch (mit
Skizze und so ...) und sich s
Ganze luschtig umsetze lost.**

Sujet: Mir finde s wirklich ganz e digge,
z Basel ... am Rhyy ... an Strand go
ligge.

Dr Vordraab und d Pfiffer: Bis mir
scheen Bruun sinn, ka s no duure, aber
fir emool zaige mir alli Figure.

Dr Major: Fir d Sicherheit und d
Rettigsawändig isch d Pämela
Schneider zueständig

D'Requisite: S Fääderball, s Mäichfett
und au Stiehl hämmer drbyy, und
schleppe alles an d Riviera am Rhyy.

S plante Programm am 13.3.2000

Punggt 4h00 starte mir die dasjöörigi
Faasnacht mit em Morgestraich. Wär
die aimooligi Atmosphääre mit uns
mecht miterlääbe, muess bym
Liechterlösche vis-à-vis vom Tinguely-
Brunne parat stoo. S'Corètege starte mir
am Mäntig/13h30 bym Parkhuus-
Yygang unter em Theaterplatz (Punggd
73 uff em Pläänli). Im Gegeurzaigersinn

laufe mir denn via Wettstaiblatz, über
d'Muba zrugg zem Märtplatz.

am 14.3.2000

Dr Zyschtig stoot au dasjoor voll im
Zaiche vo dr Kinderfaasnacht. Zwüsche
14h30-15h00 laufe mir mit unserne
«Binggis» ab vom Faasnachts-Brunne
(Tinguely).

am 15.3.2000

Am Mittwoch goot's denn im
Uurzaigersinn, also via Mittleri Brugg -
Muba - Wettstaiblatz bis zem Märtplatz.
Starte dien mer widerum 13h30 vis-à-
vis vom Tinguely-Brunne (Punggd 64).


Beträffend em nächtliche Gässle, kenne
mir folgendi Koordinaate duuregää. Am
Mäntig und am Mittwoch zwüsche
20h30 - 21h00; am Zyschtig eppis
speeter zwüsche 21h30 - 22h00 stäche
mir vom Restorant Merkur (am
Märtplatz) us, in die dunggle, herrlige,
verdräumte Gasse.

am 18.3.2000

Wie allewyl wird dr harti Kärn am
offizielle «Keeruss» (vom Comité) im
Foyer vom Muba Kongrässzentrum
dailnä. Wär mit uns dert dä Oobe
mecht verbringe, sot doch vorgängig
unserem Obmaa delifoniere (Marco
Bachmann, Delifoon P/331.32.73

am 2.4.2000

Bummel-Sunntig! D'Ussgoob 2000
organisiert dr Leue. Mir wärde
vorussichtlich öppe am 20h00 uff em
Märtplatz yydräffe. Punggt (!) 22h00
haiss'ts bym Tinguely-Brunne fir
d'Luftschnapperli Ussgoob 2000 ...
**ÄNDSTRAICH, VORWÄRTS,
MARSCH!!!**



Do als glayne Vorgschmagg,
wie d Luftschnapperli an dr
Fasnacht 2000 drhär kemme.
Mit däne Skizze het me an dr
Sujetsitzig d Idee vorgstellt.
Wie s Ganze wirgglig ussgseet
sötte dir aber am 13. Meerz
sälber aaluege!



Nit immer löön sich gueti
Idee so eifach umsetze. Das
Joor het uns (und unserer
Schnyydere, Brigitte)
vorallem s Goschtyym vil
Kopfzerbräche gmacht.

D Blaggedde

D Uusgoob 2000 isch vom Kurt
Walter gstattet worde. E
Schysssdräggziigli, wo uf ere
Wältkugele wandlet beschribt s
Sujet «Mer kemme uff d Wält!»
E Interpretation vom Comité
lutet e so: «Vom Määntig aa,
wenn s Vierigleggli schällt,
denn schrumpft bi uns am Rhy
dä Globus wieder zämme. Und
isches so wyt, denn kemme
miir uff d Wält.»



Schiiweekend Hasliberg 5./6. Februar 2000

1. D'Gondle het 10(!) guetgluunti Luftschnapperli uff 1840m diräggt vor unseri Hütte nach Käserstatt gwooge.

2. E stahlblaue Himmel und e supertolli Schiiaaflag; siggs für d'Snöbere Fränzi, d'Carvere Sandra M. oder die talentierti Esthi, mit kaputtigem Schiischue. Sogar dr Mull het si 2-Daages-Karte ussegholt!


3. Après-Ski mit DJ und Musik an dr Aquariumbar (glötelet uss em Chuchifän-schter). Do druff het sich dr Mull dr ganz Daag gfreut. Bi dr «Show»-Ylaag vom Frauerturnverein isch ganz schön Poscht ab und de Herre warm ums Härz worde.

4. Em Hans uss Giswil (e Schii-Bar-Bekanntschaff vo uns Fraue!) hän mir zem Kauf vonere Silberblagedde iberredet und het drfür e Luftschnapperliabziehbildli mitbekoo.

5. Zum Gligg isch s'Bärgrestaurant nur e paar Schritt vo unserer Hütte entfärnt gsi, so hän mir uns nach em gmietlige, feine, knoblige Chäsfondü könne halme rugele.

6. Do hinte verbirgt sich die beliebti «Bängelischissi»! E tiefs Loch und schmeggt nid grad aagnääm. Villi hän sich d Sach verklemme miesse, obwool s Fondü Wirggige zaigt het und e halbs Guggkonzärt bim «Schnäuzle» entstande isch!

Für die gschribeni Woret: Sändi



10 «vergifteti» Schiifahrer
uf em Haslibärg.

An däre Stell mechte mir regelmäässig e bitz in Erinnerung vo dr eigene Clique schwelge. Mir zaige Bilder us frienere Luftschnapperli-Zyyte. Es isch doch immer widder erstuunlig, wie die Zyyt schnäll vergoot!?



Unsere Pin. Zum 10-jöörige 1993.



Dr Marco, wie ein vonere Junge Garde, und dr Mulf... (ohne Worte)! 1987



Dr Summerflug 1991. Wenn de Frisur vo unsere Frau aaluegsch, kennsch maine, dr Puddel-Club Basel macht e Uslflug!

1994. E super Zug.
 E Totempfaal als Mayor,
 zwei Jundteressli uus
 Styropoor, e Planwaage als
 Requisit und
 e «Leering», dr Kutti.
 Si erschti offizielli
 Faasnacht als
 Luftschnapper.
 S Sujet: Uf em Kriegsplaad
 gäge s Comité.



1993 und glichzytig
 10 Joor Luftschnapperli.
 Als schlichti, scheeni
 Kleen (kaini Guggelbarbel)
 hämmer dr Zirkus um
 d Faasnacht uusspielt.
 Dr Gäg isch e Zirkuszält
 gsii, wo mr an unsere
 Halt fascht immer
 uufschteilt hänn. E
 geniali Konstruktion,
 produziert vom Werni und
 dr Mamme Hauser und
 em Willi Tschudin.



Zem d Zyyt no e bitzeli mee
zruggschruube, gseent dir doo
Dokumänt vo dr Basler
Faasnacht, wie si niemer vo
uns kennt het. Die Abbildige
sinn us em Buech «Die Basler
Fasnacht» vom Eugen A. Meier.
Mee drfoo im näggschte
Schnapplüftli.

Die eltischt Darstellig vo dr Basler
Faasnacht: Aagfiert vo me Diener, göön drey
Bürger vo dr Ooberschicht an e nächtlige
Masggebäll. Um 1590.





Au mit 85 isch dr
Drummelleerer Fritz Otto
Kaufmann no fir e
Solonummere guet gsii.
1925.



Das sin d Äeschlemer (vo Aesch?).
S Arbeitsloosgesetz het si zem Sujet inspiriert. 1900.



D Roh-Nuss Oil Comp.
1926. E Rizinus-Öl
Affäre im Grosse Root
isch s Sujet gsii.

Dr Cortège 1903 uff dr alte Mittlere Brugg. Mitgmacht hän
unter anderem Clique wie dr Pumpklub, dr Ruderklub und
d Pluscher-Clique. Clique wo s hitte nimme git.





Fotti-Wettbewerb Faasnacht 2000

Liebi Gönnerinne und Gönner
oder Frinde vo eych

Euer kreativs Aug isch gfroggt! Nämmet an dr Faasnacht eyere Fottiapparat mit. Mir sueche nämmlig die scheenschte, originellschte und witzigschte Faasnachtsbilder vom Joor 2000.

Egal welles Motiv, Hauptsach s Thema isch d Faasnacht.

Die premierte Bilder wärde mir in dr näggschte Ussgoob vom Schnapplüftli veröffentlige. Jeede Ysänder vomme premierte Fötteli bikunnt zwai Fläsche Luftschnapperli-Wyy.

Mir freye ys uff jedes Bild!



Ysändeschluss isch dr 1. Mai 2000.

Adrässe: Roger Müller, Birsquai 9, 4127 Birsfælde

PS: Jeedes yygshiggt Fötteli wird nadyyrlig zruggschiggt.

Scho mitbekoo?

Dr **Erwin Studer** het nacheme Wienachtsapéro an sym Arbetsort in Züri bi dr Haifaart si GA bis nach Belfort uusgnutzt! Wo är denne am halbfümfi amorge haikoo isch, het si Frau, s **Bethli**, die Story aber kuun kenne gaube.


Dr **Raffi Santoro** het anschiinend jetzt e Taxiunternäame. Wo är emool znacht dr Marco an Thiersteinallee hai gfaare het und eso vor em Huus stoot, schtiggt e «licht» Aadrunggene hinte ii und sait: «An d Clarastroos...»

Unsere «Boggüüs», dr **Willi Tschudin**, het kirzlig uf em Früschmärt in dr Buxeabdaylig vom Coop in Fränggedorf yykauft. Ziel isch es gsi e baar Ravioli z koche. Dehai in dr Kuchi het är denn aber gmerggt, dass är Buxe-Riebli yykauft het.

D Müller's vo Aesch hän e neys Auto. Wo dr **Mull** dä Opel am erschte Daag kaa het, ischer nachere Vorstandssitzing am Mäntig Zoobe vo Basel via Ryynach, Therwil, Eddige, Flie, Hofstette, Mariastai, Metzlerle, Glailützel, Röschenz, Laufe und Zwinge retuur nach Aesch hai gfaare. Alles in allem u Umwäg vo cirka 60 Km.

D **Eigenmann's** hänn in Schönebuech baut. Kurz nach dr Grundstalleegig isch scho dääfered worde und me isch iizooge. Und Bilder het me glaub scho an d Wänd ghänggt, wo no gar kaini gstande sin.

Und isch d **Esthi** und dr **Gerry** aigentlig unter d Nomaade gange? Die Familie het glaub in de letschte 12 Mönét öbbe 3 x züglet!



In Gedängge

Dr **Peter Bachmann**, dr Babbe vo unserem Obmaa, isch am 17. Dezämber 1999 in sym 64 Altersjoor viil z frie gstorbe. Au wenn är eigendlich nit unbedingt e vergiftete Faasnächtler gsi isch, isch är fir uns Luftschnapperli e seer wichtigi und immer gärn gseehene Persoon gsi. Nit nur, dass är alli Gstell vo unsere Kopf- und Stäggeladäärne gfertigt het, nai ... wenn s irgend e Probleem mit ere Konstruggtion gää het, isch är immer mit guete Tips und Hilfelaichtige unseri erschti Adrässe gsi. Mit em Peter hänn mir e ganz feyne Mensch verloore und ych bis sicher, em ainte oder andere Luftschnapperli wird am Morgestraich e Dräänli iber d Bagge kullere, wenn är unseri prächtige Stäggeladäärne gseet im Wind schauggle.

Mr gratuliere rächt härzligg

Zem 65. Burtzeldaag vo dr **Lotti Müller** (16.1.2000)

Zem 60. Burtzeldaag vo dr **Beatrice Kunz** (24.1.2000)

Au zem 60.: **Marianne Hügli** (29.1.2000)

Zer Hochzyyt vo dr **Michele Miescher** und em **Roland Lüdi** und glichzytig zer Geburt vom **Luca** (24.4.99)

Zer Geburt vo dr **Julia** (16.12.2000, 3550 gr. / 50 cm). S Maiteli vo dr **Kathleen** und em **Daniel Leuenberger**

Zer Geburt vom **Yannick** (9.2.2000, 3440 gr. / 51 cm). Dr Bueb vo dr **Mimi** und em **Georges Marchand**

Wichtige Termin (au fir unseri Gönner)!

30.6 bis 2.7.2000

Eidg. Pfyffer und Tamboure-Fescht in Basel (Feschdbaiz vo de Luftschnapperli und em FC Alemannia)

8. bis 10.9.2000

Fesch 50 Joor Schränz Gritte um em Schänzli Areal (Baiz vo de Luftschnapperli)

E spezielle Dangge an

dr **Roli Fleury**! Är het uns dr Fasnachtszeedel Uusgoob 2000 gratis druggt.

dr **Marcel Portmann** het dr Drugg vo dere Uusgoob vom Schnapplüfli ermeegligt.

d **Claudia** und dr **Bruno Annen** hänn ys aalöslig vom Summeruusflug 1999 zue sich nach Boll (BE) zem e Grilldaag yyglaade.

Und überhaupt mechte mir widder emol **Allne unsere Gönner** fir die finanzielli und grossartige Unterstützig dangge, vo teilwys syt unserer Grindig stattfindet!

Sött an däre Stell öbber vergässe gange sii, mecht sich dr Schriibeling bi däne Persoone entschuldige. Mängmool kemme halt nit alli Informatione ze sine Oore.

**Besser als Fasching und Karneval:
Basler Fasnacht und ÖKK.**

♪ ♪ täta, täta ...!




ÖKK
Öffentliche Krankenkassen
Schweiz

Jung und unkompliziert.